

# Häsigasse 8

Vorname	Name	Beruf
Fu	Tschang	Austauschstudent aus Huangnan, Wirtschaftspraktikum bei der UBS
Simona „Sime“	Zumbach	Kindererzieherin in der KITA Spatzenäscht in Menziken
Tina	Neumann	Coiffeuse
Flora	Aarech	Floristin, kurz vor der Eröffnung ihres eigenen Geschäfts
Emanuele	Tecleo	Klavierlehrer
Ellen	Lindberg	Musik-Studentin, Gitarre
Julia	König	Arbeitslos, gelernte Köchin, Pechvogel, glaubt an Horoskope, pendelt Fotos aus
Josh	Stebler	Sanitär der Firma Stebler & Co.
Tim	Aeschbach	Computerfreak
Hugo	Schwarz	Kripo Aargau, kurz vor der Pension stehender Beamter
Vanessa	Hösli	Kripo Aargau, Aspirantin

Angelina	Mosimann	Moderatorin Seetal TV
----------	----------	-----------------------

**Spieldauer:** 75 Minuten

## Szenenablauf

Szene 1	Kripo in der WG.....	3
1.1	Song «ein Mord».....	3
1.2	Im Wohnzimmer, Zeit: 12:50 Uhr.....	3
1.3	Im Wohnzimmer, Zeit: 12:55 Uhr.....	4
1.4	Im Wohnzimmer, Zeit: 13:00 Uhr.....	5
1.5	Im Wohnzimmer, Zeit: 13:05 Uhr.....	6
Szene 2	Verhör .....	8
2.1	Flora Aarech.....	8
2.2	Tina Neumann und Josh Stebler .....	8
2.3	Julia König .....	9
2.4	Tim Aeschbach .....	9
2.5	Sime Zumbach und Emanuele Tecleo .....	9
2.6	Ellen Lindberg .....	10
2.7	Fu Tschang.....	10
2.8	Schwarz und Hösli .....	11
Szene 3	Kurz vor den News .....	<b>Fehler! Textmarke nicht definiert.</b>
3.1	Das Schrübéli wird gefunden. ....	<b>Fehler! Textmarke nicht definiert.</b>
Szene 4	Seetal News mit Reaktionen der WG BewohnerInnen.....	<b>Fehler! Textmarke nicht definiert.</b>
4.1	Seetal News .....	<b>Fehler! Textmarke nicht definiert.</b>
4.2	Emanuele und Tim .....	<b>Fehler! Textmarke nicht definiert.</b>
4.3	War es die da?! (Rap) .....	<b>Fehler! Textmarke nicht definiert.</b>
Szene 5	Beschuldigungen.....	<b>Fehler! Textmarke nicht definiert.</b>
5.1	In der WG.....	<b>Fehler! Textmarke nicht definiert.</b>
5.2	Polizeirevier .....	<b>Fehler! Textmarke nicht definiert.</b>
5.3	zurück in der WG.....	<b>Fehler! Textmarke nicht definiert.</b>
5.4	Streit.....	<b>Fehler! Textmarke nicht definiert.</b>
5.5	Schmerzen .....	<b>Fehler! Textmarke nicht definiert.</b>
5.6	Gute Nachricht .....	<b>Fehler! Textmarke nicht definiert.</b>
5.7	In der Nacht .....	<b>Fehler! Textmarke nicht definiert.</b>
Szene 6	Das Ende .....	<b>Fehler! Textmarke nicht definiert.</b>
6.1	Frühstück.....	<b>Fehler! Textmarke nicht definiert.</b>
6.2	Spekulationen über den Ring.....	<b>Fehler! Textmarke nicht definiert.</b>
6.3	Im Polizeirevier.....	<b>Fehler! Textmarke nicht definiert.</b>
6.4	Im Wohnzimmer, knapp nach 18 Uhr .....	<b>Fehler! Textmarke nicht definiert.</b>
6.5	Im Wohnzimmer, 18:30 Uhr.....	<b>Fehler! Textmarke nicht definiert.</b>
6.6	Irgendwo am Telefon .....	<b>Fehler! Textmarke nicht definiert.</b>
6.7	Gegen 23.00 Uhr in der WG.....	<b>Fehler! Textmarke nicht definiert.</b>
6.8	Ende gut, alles gut.....	<b>Fehler! Textmarke nicht definiert.</b>
6.9	Es war die da! (Rap) .....	<b>Fehler! Textmarke nicht definiert.</b>
Zusatz 1:	Szenen und Personenliste .....	<b>Fehler! Textmarke nicht definiert.</b>
Zusatz 2:	Probeplan .....	<b>Fehler! Textmarke nicht definiert.</b>

## Szene 1 Kripo in der WG

---

Zeit: 10'

Ohne Josh Stebler, Tina Neumann und Vanessa Hösli und Hugo Schwarz.

Einige Stunden nach dem Mord, kurz nach 12:00 Uhr. Das Zimmer von Victoria ist fertig untersucht, die Leiche wurde schon weggetragen.

Emanuele lässt beim E-Piano einen Beat laufen. Die anderen betreten die Bühne und begleiten Emanuele rhythmisch mit Geräuschen von Möbeln und Gegenständen.

### 1.1 Song «ein Mord»

Chor E Mord, e Mord, e furchtbare Mord.  
Passiert, i de Nacht, a de Häsigass acht.  
Us, verbii, das isch's wohl gsii.  
Verstickt, im Bett,  
(alle stoppen)  
- findet Sie das nätt?  
Tim E Mord?  
Alle (durcheinander)  
E Mord...  
Sime Emanuele! Gib mir de Akkord.  
(Melodie von «knocking on heavens door»,  
Akkordfolge: G/D/Am<sup>7</sup>/G/D/C)

Die geilschti WG, so isch's gsii,  
mit Lache, Krache, wie's muess sii.  
Händ nüt Böses dänkt debii,  
isch das alles jetzt verbii?

Chor (Refrain)  
D' Vicky klopft as Himmelstor,  
klopft, klopft, klopft as Himmelstor...

Julia ...hörid uf, hörid eifach uf!

Alle reden wild durcheinander, das E-Piano nimmt den Rhythmus vom Anfang wieder auf.

Chor E Mord, e Mord, e furchtbarer Mord.  
Fu Genau, genau, sie wal wundelschönes Flau.  
Chor D' Vicky, isch tot, euses Läbe os em Lot.  
Us, verbii,....  
Julia (sie schreit!)  
Chor (geflüstert)  
Isch es das jetzt gsii?

### 1.2 Im Wohnzimmer, Zeit: 12:50 Uhr

Julia Sie hett scho immer welle, dass ich ihri Zuekonft uspändle.

Ellen Hör uf! Die Pändlerei macht niemer wieder lebändig.  
 Julia Aber ich hättis vielleicht chönne verhindere.  
 Ellen Bes ruhig. Es schliift.  
 Tim Wett no öpper en Kafi?  
 Flora Ich ha am zwoi en Termin mit em Plättlilegger. Ewig chan ich of die  
 zwoo Type vo de Kripo ned warte.  
 Fu Was ist mit Waltel?  
 Flora Warte, Fu. Warten.  
 Fu Ah, ich velstehen. Konfuzius sagen immel:  
 Walten tut man am besten im Galten.  
 Emanuele De Plättlilegger isch jetzt sicher ned wichtiger.  
 Tim Möchtest du einen Kaffee, Fu.  
 Fu Nein danke. Sonst muss ich immel auf del Klo rennen, wo ist kaputt.  
 Flora Die Schiisi isch immer no ned gflickt?  
 Fu Gefickt?  
 Sime Fu, halt einfach deinen Mund!  
 Wenn lehrt dä ändlich Mundart.  
 (geht zu Emanuele)  
 Ond wie goht's dir?  
 Emanuele Ich stell mir anduurend vor, ich hocke mit em Fu im Zimmer ond  
 rauche Shisha.  
 Sime Was?  
 Fu Konfuzius sagen immel:  
 Die glössten Göttel sind Shiva und Shisha.  
 Sime Fu!  
 Fu Ich bin schon geschwiegen.  
 Sime Au am Hochdütsch cha mer no schaffe.  
 Julia Ich muess glaub im Mike Shiva alüüte.  
 Ellen De gisch s'Gäld gschüiter mir!  
 Emanuele Wo isch eigentlich d' Tina?  
 Flora Die sett jede Momänt zrogg sii. Sie hett hött Morge en Fortbildigskors  
 im Hoorfärbe z'Suhr im Haus der Schönheit.  
 Julia Wo isch s' mis Handy. Ich bruuch de Mike.  
 (Findet es, Ellen kommt ihr aber zuvor.)  
 Ellen Julia. Spar der diis Gäld, han ich gseit. Abgseh devo hett d'Polizei  
 s'Telfoniere verbotte!  
 Tim Ellen! Chills.  
 Ellen Es isch wohr!  
 Tim (zu Julia)  
 Ond bitte frog dich jetzt ned, werom das grad dir passiert. Das isch  
 reine Zuefall.  
 Ellen Meinsch?  
 Tim 100 Pro.  
 Ellen Das muess ich zerscht uspändle.

Es klingelt dreimal an der Tür.

### 1.3 Im Wohnzimmer, Zeit: 12:55 Uhr

Fu O. Wenn es dleimal klingelt ist es in Schweiz nicht das Pöstlel...  
 Josh ... halli hallo. D' Firma Stebler isch do!

Ond was han ich debii?  
 (Hält etwas Kleines in die Höhe. Niemand antwortet)

Flora Super! Dä au no!

Josh Was isch denn do los? Wägere kapotte WC Spüelig macht mer doch ned sones Drama.

Tim (zu Josh)  
 Wetsch du au no es Kafi? Red Bull hetts grad keis. D'Vicky hett...

Julia (geht auf Josh zu)  
 ... miis Pändel hätts chönne voruus gseh, totsicher!

Josh Sind ihr dore bi rot, oder was.

Fu Oh, liebel Josh. Es ist passiert etwas «Gesätzliches».

Josh Was?

Sime Etwas Entsetzliches, Fu.

Fu Oh, ich weiss. Man kann auch sagen etwas Fuchterliches!

Tim Fu, lass das. Deutsch üben wir ein andermal. Dafür gibt es bessere Gelegenheiten.

Josh Ich bin doch i de Häsigass 8 ond ned inere Klapsmöhli, oder?

Emanuele Wer weiss das scho.

Julia Josh, darf ich dis Handy. Ich bruche de Mike Shiva. Dringend.  
 (Tim und Ellen gehen auf Julia zu.)

Tim Setz emol ab, Julia.

Ellen Ond nimm das do.

Julia (Schaut, was ihr Ellen in die Hand gedrückt hat)  
 Das wott ich zerscht uspändle!

Tim (fast singend)  
 Julia, das isch Baldrian.

Ellen Dä beruhigt dich.

Tim Dä loht dich vergässe.

Ellen Dä macht dis Läbe wieder sonnig.

Tim Dä hilft besser als jede Mike of der Wält.

Beide (Streng)  
 Aber nor wenn du dä abeschlücksch!  
 (Julia erschrickt und tut es.)

Draussen quietscht ein schnell parkendes Auto.

Flora Tina isch im Aamarsch.

Josh Die Frau hett eifach Tämparment. Sogar bim Brämse.

Flora Mer chan au vo öppis z'vell ha.

Josh Wie meinsch das? Hesch jetzt au no öppis gäge Tina?

Flora Ich ha eifach am zwoi en Termin mit em Plättlienger.

Es klingelt an der Tür, Tina betritt das Wohnzimmer.

#### 1.4 Im Wohnzimmer, Zeit: 13:00 Uhr

Tina Do bin ich.

Flora Onöberhörbar.

Josh Hei Schatz, do inne fehlt ned nor es Schrübeli för d'WC Spüelig, do inne fehlt jedem eis.

Tina Was isch denn do los?  
 Julia Dä Baldrian rumoret gwalting i mim Buuch.  
 Sime Jetzt nor kei Dönnpfiff, Julia. Ich ha s'Gfühl, au d'WC Schössle macht nömm de stabilschti lidrock.

Tina Om was goht's?  
 Josh Das frog ich mich au scho die ganz Ziit. Aber im Stebler muess mer das ned erkläre. Eine wie de Stebler gfindt so öppis eighändig use. Tina, Schatz. Mir stönd chorz vor eme Ufstand gäge de bescht Sanitär im Omkreis vo 100 Kilometer, will d'WC Spüelig sitt 6 Täg ned fonktioniert. Aber wie luudet euses Motto:

Emanuele Hast du im Hause ein Problem...  
 Tina Stebler löst es mit System.  
 Josh Voilà.  
 Ellen Josh, om das goht's doch jetzt überhaupt ned.  
 Tina Om was denn?  
 Julia Ich gseh überall Schmättlerling!  
 Sime Was händ ihr dere gäh? Valium?  
 Fu Das ist genau wie mit Shisha.  
 Konfuzius sagen immer...  
 Sime ...mit einer Shisha wird alles nur noch schlimma.  
 Vergiss es!

Fu Abel wil sagen ganz anderstel.  
 Flora Fertig!  
 Ellen Es schliift brutal, Mann.  
 Flora So eng isch mir das Huus no nie vorcho. Ich goh jetzt ufe ond hole d'Kripo.  
 (geht ab)

Josh Kripo? Wäge de WC Spüelig?  
 Tim Josh. Es isch alles wäge de Victoria.  
 Josh Ich has jo immer gseid, dass sie d'Spüelig of em Gwösse hett.  
 Ellen Josh!  
 Emanuele Sitz ab!  
 D'Josch. D' Vicky. Sie isch tot.

Josh (Stille)  
 Jetzt isch mir grad Schrübeli os de Hand gheit, wo ich sitt einere Woche för euchi WC Spüelig probiert ha ufztriibe.

Fu Konfuzius sagen immel:  
 Ist del Schlübéli am Boden, kannst du den Handwelkel nicht loben.

Hugo Schwarz betritt das Wohnzimmer

### 1.5 Im Wohnzimmer, Zeit: 13:05 Uhr

Schwarz Wie ich ghört han, isch die fehlendi Person itroffe.  
 Tina Do isch sii.  
 Schwarz (geht auf Tina zu und zeigt ihr den Ausweis.)  
 Schwarz, Kriminalpolizei.  
 Tina Neumann, Tina Neumann.  
 Schwarz Mini Kollegin nimmt grad ihri Personaldate uf.  
 (ruft nach oben)

Hösli Frau Hösli! Personaldate vo de Frau Neumann!  
(aus dem Off)  
Ich chome jo scho!  
(betritt die Bühne)

Schwarz Was händ Sie jetzt no dobe gmacht?  
Hösli De Lippgloss usprobiert, Herr Schwarz.  
Schwarz Was?!

Hösli Chliine Scherz, Herr Schwarz.  
Ich nehme aa, Sie sind d'Tina Neumann?

Tina Richtig.  
Grüezi Frau Hösli.

Hösli Frau Neumann. Nämed Sie doch Platz. Denn chan ich grad Ihri  
Date ufnäh.

Schwarz (sieht Josh Stebler)  
Ond Sie?

Josh Ich? Ich bi de Josh Stebler vo de Firma Stebler & Co, die Kompetenz  
im Sanitärbereich, ... «denn nur mit Stebler tust du dich nach dem  
Spülen richtig wohl und sauber fühlen».  
Nor im Momänt fehlt mir grad es Schrübeli.

Schwarz Ich ha oft mit so Lüüt z'tue, Herr Stebler.  
Hösli Super Joke, Herr Schwarz!  
Schwarz (schaut sie streng an)  
Ich meines ernscht, Frau Hösli!

Hösli (zu Tina)  
Zivilstand?

Tina Befröndet.

Hösli Mit wem?

Josh Mit mir!

Schwarz Zu ihrer Information: D' Spuresicherig im Zimmer vo de Frau Hunziker  
isch bald abgeschosse. Ich bitte sie alli, s'Zimmer vo ihre bis of wiiteres  
ned z'beträte. Wiiter muess ich sie bitte, alli Termine för hött abzäge  
ond mir of de Polizeiposchte z'folge.  
(Reaktion.)

Flora Aber das goht ned! De Plättlilegger wartet!

Hösli D'Ufkläärig vom Mordfall hett Vorrang. Das sett au Ihne klar sii, Frau  
Aarech.

Flora Miis Bluemegschäft goht i zwee Woche uuf.  
Ond das alls wäg dere blöde Chue!

Tim Seve. Hör uf.

Ellen Mann. Das isch de totali Schliifertag.

## Szene 2      Verhör

Zeit: 6'

### 2.1 Flora Aarech

Flora            Genau das wo jetzt passiert, hett sie welle.  
Hösli            Schön langsam, Frau Aarech. Wer hett was welle?  
Flora            Dänk d' Vicky, die... Sie hed mich immer abegmacht. «Du schaff das nie, es eignigs Gschäft ufztue», hett sie emmer gseit. «Vergess ned, du bisch nor i d'Chliiklass.»  
För die mach ich sicher kei Chranz as Grab!  
Schwarz        Wo sind Sie i de Mordnacht gsii?  
Flora            I mim Bluemlade. Ich ha Belüüchtig ufe ghängt.  
Schwarz        Elei?  
                  (Flora nickt)  
                  Ond denn?  
Flora            Bin ich hei ond ha mir en Dose Ravioli ufgmacht. Denn isch d'Vicky cho ond hett gfrogt, ob ich de Strom i d'Kabel ine brocht ha.  
Schwarz        Wie händ Sie reagiert?  
Flora            Ich ha Dose Ravioli gnoh ond bi i mis Zimmer.

### 2.2 Tina Neumann und Josh Stebler

Hösli            Frau Neumann. Sie händ d'Liiche am Morge am 6i gfonde. Was händ sind Sie om die Ziit im Zimmer vo de Frau Hunziker gmacht?  
Tina            Min Lippgloss gsuecht. Er isch wieder einisch ned ome gsii. Ond d'Victoria hett immer mis Züügs "usglehnt" ohni z'froge.  
Schwarz        Händ Sie de Lippgloss gfonde?  
Tina            Jo. Zmittzt i ihrem Poff.  
Hösli            I mine Akte stoht...  
Schwarz        ...i eusne Akte.  
Hösli            (Böser Blick)  
                  Also nomol. I eusne Akte stoht, dass Sie bereits vorbestroft sind, wäge Diebstahl.  
Josh            Was? Aber Tina Schatz! Das hesch du mir no gar ned verzellt.  
Tina            Mach jetzt jo ned eine of Beziehigsstress, Chräbeli!  
Schwarz        Herr Stebler! Sie sind de Frönd vo de Frau Neumann, wonid aber ned i dere WG. Händ Sie i de Mordnacht a de Häsigass 8 gschlofe?  
Josh            Jo. So wie meischtens.  
Tina            Aber keini Details, Chräbeli.  
Schwarz        Isch Ihne i de Mordnacht öppis ufgfalle?  
Josh            Wenn ich schlofe fallt mir nüt uf.  
Tina            Ned nor denn.  
Josh            Spätzli. Mengisch hesch eifach z'vill Temperamänt.  
Hösli            (zu Tina)  
                  Isch Ihne öppis ufgfalle?  
Tina            Nei, nüt.  
Hösli            Ond dass de Chopf vo de Frau Hunziker onderem Chössli gsii isch?  
Tina            So hett sie immer gschlofe, wenn d'Ellen im Zimmer näbe zue Gitarre güebt hett.



### 2.3 Julia König

Julia Die Liiche stresst mi total. Debi hätt ich mit mim Pändel alles chönne verhindere.

Schwarz Wie meined Sie das?

Julia De Mike Shiva of shiva.tv hett mir's mit de Charte gleid.

Hösli Sie glaubid a Esoterik?

Julia Sie öppe ned?

Schwarz Was händ Sie i de Mordnacht gmacht?

Julia Was dänk. Ich ha shiva.tv igschalte gha. D' Janis hett wieder einisch ihres Problem mit ihrem Maa besproche.

Hösli Wer isch d' Janis?

Schwarz Frau Hösli. Lueged Sie de Mike nie?

Hösli Os Prinzip ned.

Schwarz Jo denn wössted Sie, wer d' Janis isch.

Julia Aber sie närvt mängisch.

Hösli Bes wie lang händ Sie die Sändig gluegt?

Julia Bis noch de zwoi.

Hösli Isch Ihne i de Nacht öppis ufgfalle?

Julia Es hett gstörmt veross. S' Ziggi rauche of em Balkon isch überhaupt keis Vergnuege gsii.

### 2.4 Tim Aeschbach

Tim Scheisse. Wenn das mini Eltere erfahrid.

Hösli Was isch denn, Herr Aeschbach?

Tim Ich dänke lieber ned dra.

Hösli Noch mine Akte...

Schwarz (räuspert sich)

Hösli ...noch eusne Akte hett Ihri Familie scho öppe mit de Polizei z'tue gha.

Tim Wänd Sie mit dem säge, dass ich en Mörder bin?

Hösli Ich stelle nor fescht, Herr Aeschbach.

Schwarz Of Ihrem PC hett's en Huufe Föteli vo de Vicky.

Tim Jo ond? Sie hett sich halt gern la fötele.

Schwarz Eifach so?

Tim (keine Antwort)

Schwarz Wie muess ich das verstoh?

Hösli Wie müend mir das verstoh, Herr Schwarz.

Tim Irgendwie han ich jo Startkapital bruucht för mis Gschäft.

Hösli Aeschbach Electronics GmbH. Wie vell?

Tim 20'000 Franke.

Schwarz Ond d'Vicky hett Ihne das eifach so gäh?

Tim Sie hett jo gnueg Gäld gha.

### 2.5 Sime Zumbach und Emanuele Tecleo

Schwarz Frau Zumbach, Herr Tecleo. Sie sind i de Mordnacht amene Konzärt gsii?

Sime Am Konzert vo mim Frönd. Er hett en eignu Bänd.

Emanuele "Cerveza". Sicher au scho ghört.

Schwarz Om weli Zii sind sie zrogg gsii?

Sime D'Chileglogge händ grad zwölfi gschlage.  
D' Julia isch am shiva.tv luege gsii. Sie hett sich grad über irgend e Tusse ufgregt, wo irgend es Problem mit ihrem Maa gha hett.

Hösli D' Janis.

Sime Könnid Sie die?

Hösli Sie müend die Sändig nor einisch luege ond Sie wössid, vo wem ich rede.

Schwarz Ond Sie, Herr Tecleo?

Emanuele Ich ha mit em Fu... äh, isch egal.

Schwarz Bi de Ufklärig vomene Mordfall isch nüt egal. Also?

Emanuele Noch dem Gig hett's eifach no e gmüetlichi Shisha-Rondi bruucht.

Schwarz Shisha. Isch notiert.

Hösli Of Grond vo de Föteli isch d' Frau Hunziker en überdorchschnittlich attraktivi Frau gsii.

Sime De Emanuele isch mir absolut treu, wenn Sie das meinid.

Hösli Herr Tecleo?

Emanuele Ich cha nor wederhole, was mini Fröndin grad gseit hett. Absolut treu.

## 2.6 Ellen Lindberg

(Ellen Lindberg isst Gummibärchen)

Hösli Frau Ellen Lindberg. Musigstudentin. Was händ Sie i de Mordnacht gmacht?

Ellen Zerscht Intervall güebt, elei, das schliift brutal, spöter Gitarre. Denn han ich welle go schlofe, aber deWind hett d'Läde so luut gäges Fenschter gschlage, dass es eifach ned gange isch. Chorz noch de Zwölfe bin ich denn is Fernsehzimmer mit em Laptop ond han mir «Irrwege des Herzens» agluegt. Miin Lieblingsfilm Pilcher Film.

Hösli Isch soscht no öpper im Zimmer gsii?

Ellen D' Julia. Sie hett sich wieder gnärvt über irgend...

Hösli en Tusse bi shiva.tv. Sie heisst öbrigens Janis.

Ellen Könnid Sie die?

Schwarz Händ Sie vo de Frau Hunziker Gäld becho?

Ellen Nor Indirekt. Sie hett d'Hälfti vo de Mieti übernoh.

Hösli Wie vell isch d'Hälfti?

Ellen 1500 Franke im Monet.

## 2.7 Fu Tschang

Schwarz Herr Fu. Was hatten Sie für ein Verhältnis zu Frau Hunziker?

Fu Leidel keines.

Hösli Sie waren an Frau Hunziker interessiert?

Fu Sichel. Ach, wal so nettes Frau.

Hösli Nor nätt?

Schwarz Frau Hösli!

Was händ Sie i de Mordnacht gmacht?

Fu Ich hab nicht gelacht.

Schwarz Nein. Ich habe Sie gefragt, was Sie in der Mordnacht gemacht haben.

Fu Oh, ich weiss. Emanuele und ich haben mein bestel Shisha  
 geläuchelt.  
 Hösli Und dann?  
 Fu Konfuzius sagen immer:  
 Einel Shisha ist nul nett, gehst du nachhel gleich ins Bett.  
 Schwarz Haben Sie etwas gehört in der Nacht?  
 Fu Ich habe getläumt von vieles schönes Frauen. Alle haben gesingt  
 «Fu, du bist unser Gulu!»

## 2.8 Schwarz und Hösli

Hösli Ond?  
 Schwarz Ich muess jetzt is Bett.  
 Hösli Es isch erscht knapp achti?  
 Schwarz Miis Buchgfühl seit mir, dass mir dä Fall hött nömme lösid.  
 Hösli Buchgfühl. Herr Schwarz. Das isch doch altmodisches Züügs.  
 Schwarz Ich bi bis jetzt guet gfahre demit.  
 Hösli Sie hättid besser of Pupille vom Fu Tschang gluegt.  
 Schwarz Wieso?  
 (Keine Antwort)  
 Schwarz Frau Hösli. Wänd Sie mir jetzt säge, dass i sinere Pupille stoht, dass er  
 de Mörder isch.  
 Hösli Nei, aber er lügt.  
 Schwarz So. Ond ich säge Ihne eis. De Hauptkommissar i dem Fall bin ich,  
 Frau Hösli, de Hugo Schwarz. Ond de Hugo Schwarz seid jetzt guet  
 Nacht.  
 (steht auf und geht ab)  
 Hösli Sture Bock.

Umbau, Emanuele spielt auf dem Klavier, Ellen steht bewundernd neben ihm. Die  
 anderen gehen aufgereggt durcheinander. Tina und Sime holen eine Leinwand von  
 der Decke (Fernseher). Fu und Josh kriechen auf dem Boden umher und suchen  
 das Schrübeli.

Ist der Umbau beendet, hört Emanuele zu spielen auf.